

# Powšitkowne WOZJEWJENJA

njedźelu, 29. julija 2018

## Intensiwny kurs češćiny

W Chrósćicach na farje přewjedže Jan Breindl wot pónđzele do soboty, 6. do 11. awgusta, intensiwny kurs češćiny. Tón započnje so wšědnje w 14 hodź. a traje hač do wječora. Sobotu je wulět planowany. Dokładny wotběh je na internetowej stronje [www.posol.de](http://www.posol.de) wozjewjeny. Zajimcy njech so w Rěčnym centrumje WITAJ přizjewja pod telefonowym čislom (0 35 91) 55 04 00 abo z mailku na [witaj-bautzen@sorben.com](mailto:witaj-bautzen@sorben.com).

## Šolowy dzeń

Na lětušim swójbny popołdnu njedźelu, 26. awgusta, wobrubu projektowy chór serbskich dźěći zakónčacy nyšpor. Zajimowane dźěći su wutrobnje přeprošene sobu spěwać. Proba budže sobotu, 18. awgusta, wot 9 hodź. hač do 14 hodź. w Don Boskowym Domje we Worklecach. Witane su tež te dźěći, kotrež njejsu w meji sobu spěwali.

## Mandźelski seminar

Přizjewjenja za přihot na sakrament mandźelstwa wot pjatka do soboty, 30. nowembra do 1. decembra, w Smochćicach přijimuju pisomnje hač do srjedy, 7. nowembra, w Dekanatnym dušepastyrstwje we Worklecach. Formulary k tomu su w cyrkwjach wupołożene.

## Koncert w klóštrje Marijinej hwězdze

We wobłuku Łužiskeho hudźbnego lěća přewjedže so sobotu, 4. awgusta, we 18.00 hodź., w cyrkwi klóštra Marijineje hwězdy w Pančicach-Kukowje koncert z marijanskimi twórbami nowych a staršich mištrov ze wšelakich epochow. Pod heslom „Salve Regina“ wuhotuje jón projektowy chór ze sopranistku Romy Petrick, smyčkarjemi Serbskeho komorneho orchestra a Feliksom Brojerom na piščelach. Cyłkowny nawod změje cyrkwin-skohudźbny direktor Friedemann Böhme.

## Chórowy koncert w Domje biskopa Bena

K zakónčenju 16. Smochčanskeho chóroweho a instrumentalneho tydženja wuhotuja wobdźělnicy sobotu, 4. awgusta, w 19.30 hodź. koncert pod heslom „Skandinawiska chórowa hudźba“. Hudźbny nawod w Domje biskopa Bena w Smochćicach změjetaj profesor Werner Patzelt und Hubert Gößwein.

## Wosebite wodženje po Smochčanskim parku

„Štož stare štomy a rostliny powědaja“ rěka heslo, pod kotrymž přeprošuje Smochčanski Dom biskopa Bena njedźelu, 19. awgusta, na wosebite wodženje po tamnišim parku. Michaela Noack, krajinaowa architektka z Drježdźan, je wuběrna znajerka Smochčanskeho hrodowego parka a wodženje nawjeduje. Zetkanje zajimcow je w 15 hodź. při studni na dworje. Po wodženju je składnosć, wo widžanym a słyšanim so rozmołwjeć abo při napoju na gitarowe zynki sluchać.